

መቃብላት ወዘረት ዐድል አሰይደ ፎውዠዩ ሃሽም

እብ መናሰበት ሳምን ቃኑን ውዛረት ዐድል



ሰአል:- ሓይሰት ወዘረት፡ ሀደፍ እለ ሳምን ቃኑን ሚቱ ወምነ ደዓም ለገብአት ሳምን ቃኑን እብ ሚ ትፈንቴ ወምነ ናይ ደዓም ሚተጃርብ ትረከብ፤

በሊሱ፦ ዲብ ዲሰምበር ናይ ሰነት 2021 እተ ለወዴናህ ሳምን ቃኑን፡ “ቃኑን ወዐማር ወጠን” ለትብል ስቅራት ዐለት እለ። እሊ እምብል እንዴ ህሌነ፡ ምነ ነባሪ መጅተማዕ ኤረትርዮ ለወክል ተእሪክ ወዓዳት እንዴ ትበገስነ፡ እምበል አትካራም እንሸቄ ዲቡ ለጸንሐነ ብናእ ወጠንዮት ወሐቅ መዋጥን እግል ነአክድ እንዴ እንቤቱ። እግልሚ፡ ሕነ ምንኬን ዕሉን ወሳይቅ ለገይስ ተእርክ እኩድ ወሐቂቀት ብነ። ምን ክልአት ለልትቃረሞ አፍካር ወመባድእ እንዴ ፈገርነ ዲብ ትቡት ናይለ ለነህይቡ አውመ ለእንቀድሙ ከደማት ቀዋኒን ዕሉን ሌጠ እንዴ ኢገብእ፡ እሊ ቀዋኒን እሊ እግልነ መስል መ ኢፋሉ፤ ሕነ ህዩ እግሉ እንመስል መኢኮን፤ ለቀዋኒን እግል መጅተማዕነ መስል ሚኢመስል፤ እግል ልትደረስ ውዛረት ዐድል እምበል አትካራም ትከድም ዲቡ ጸንሐት። ለአሳሰዩን ቀዋኒን እንዴ ትፈረገው ወትዳለው ዲብ ሸዐብ ክም በጽሐውመ ክልነ ለእንፈቅዱቱ።

እሊ ዲብ ሰነት 2015 ለተአምበተ ለዲብ ባካቱ ለህሌ አፍርዐት ሌጠ እንዴ ኢገብእ፡ ሐድ አክል አዩ እግለ ነባሪነ ሻርሐ ወማሰሉ ህለ፡ እብ ፍዕል ህዩ፡ ለምን አበን ጀደን ምን ግም እት ግም እንዴ ልትወረስ ወልትሐላለፍ ለመጽአ ቀዋኒን አክል አዩ ውኩሉ ህለ፡ ቃኑን ውርስ ዓዳት መጅተማዕ ኤረትርዮ ሰበት ገብአ፡ ምን ዕሉን ወሳይቅ ቃኑን ወአፍካር መክሐደ ወቅራመት እንዴ ሪምክ፡ እግለ ቃኑን ለለአታምም ወለከምክም፡ ተጥዊር ናይለ መጅተማዕ ለለሐብር እግል ልግባእ ወጅቡ። ዲብ ሰነት 2021

ለወደኛሁ ጌማም ናይላ አስክ እለ ነኣትዮም ለጸነሐነ፡ እትሎም መባእድ እሎም ለትነደቀው ቶም ሚኢኮን፡ ሚነዋቅስ ሀለ እግሎም፡ ሚእግል ነኣትምም ዲቦም እንቀድር፡ ለልርኤ ዐለ። ምን ሐረስ እለ፡ እበ ሐቴ ጀሀት ምነ እተ ዶል ለሀ ለትረከበ ተጃርብ እንዴ ትካእለለ ለመጽኦ ወዲብለ ማሕበር ኅማት ለዐለት መሻረከት፡ እተዩ ደረጀት ባጽሓም ክም ህሌነ፡ ወሳይቅነ ሚመስል፡ አሳስ ዓዳትነ ወነባሪነ ላቶም ተእሪክ ረዱም ለቦም፡ ታክያት ነባሪነ ወዓዳትነ ላቶም፡ ቃኑን መጅተማዕነ ወሄራር ዐማርነ ለተምትሞ ከብት ወሳይቅ ታዩንነ። እብ እንክር ብዕድ እግል አተላላይ መጅተማዕ፡ ከሊቅ ውሕደት ወመቅሬሕ ሕበር ወደማነት እት ኖስ ለለፈርዩ ረኤነ። ደማነት ዲብ ኖስ እብ ክምኩም እብ ደረጀት መጅተማዕ ወእብ ደረጀት ወጠን ሚ ክምሰል መስል፡ ነባሪነ አክል አዱ ሻርሓሙ ወዲብ ፍዕል እርኡያሙ ህሌነ እግል ንአምር ሰዴነ። ክምሰለ ዲመ ለእምብሉ ዐዳለት መብዳእ ገብአት ምን ገብእ፡ ቃኑን ህዬ ውርስ ዓዳት አስልቱ። እሊ ውርስ ዓዳት እሊ እብ ለገብአ አስባብ እንዴ ኢበሌ ወለኢልትመሳሕ፡ ሕሽመቱ እንዴ ተአከደት ወተሐፊዘት ምን ጂል ዲብ ጂል እግል ልትዐዴ ቡ። ዲብ ከሊቅ ጅንሰዮት አውመ ወጠንዮት፡ ዲብ አከደት ሐቅ፡ ዋጅባት ወመሱልዮት መዋጥን እት ፍዕል እግል ልውዐል ሰበት ወጅቡ፡ እሊ ቃኑን እሊ ሚ መስል እንዴ እምቤ እግል ንፈትሹ ወንርአዩ ጅሩባም ዐልነ። ሰበት እሊ ነባሪ እምብል እንዴ ህሌነ ምስል ዐዳለት ወሕርዮት ናይላ መጅተማዕ ወእግል ኩሉ መክሉቅ ናይ ሕበር ውርስ ነባሪ። እለ ናይ ሕበር ውራሰት እለ ላኪን እግል ትትአከብ ወትትሐፊዝ ሰበት ለአስትህለ፡ ክም ክሉ ዲብ ሐያት መንበረት ወዋጅባት እጅትማዒ እት ሕድ እንዴ ትቀረነ ክም ገይስ ወእግል ልትመም ዲቡ ለቡ ጋራት ክምሰል ሀለ እግል ነአምር ብነ። እሊ ዲመ መራዐየት ተአትሐዝዩ። ዓፍየት መዋጥን ዲመ መራዐየት ተአትሐዝዩ፡ አምር ወዕልም ናይላ መዋጥንመ እተ ክምሰልህ፡ ምስለ ነባሪ ውራሰት እንዴ ትቀረነ ለገይስ ዋጅባት ህዬ ሀለ። እብ እንክር ብዕድ ህዬ፡ አዳም እግል ልምበር ለለአትሐዝው አሳሰዱን ሓጃት እግል ልአክብ ነባሪሁ ቱ።

ክምሰለ እምብሉ ለጸነሐነ መክሉቂን ሰበት ሕነ፡ እግለ ውራሰት ናይ ሕበር እብ ክምኩም፡ አውመ እብ አንፋር፡ ዓይላት፡ ኮም፡ ማዕዩ፡ መጅተማዕ ወወጠን እንዴ እምብል ሰበት እንገይስ፡ ለነባሪ እት ፍንጌ እሊ ለትሸርሐ ክፋላት መጅተማዕ ለህሌት ዕላቀት ሸሬሕ። እሊ ነባሪ እሊ እት ረአስለ ሳብተት ታክያቱ እግል ልትነደቅ ሰበት ለአስትህሉ፡ ጌማማት እግል ኒዴ ወምን መጅተማዕ በሊስ እግል ንርከብ እንዴ ትባህለ፡ እለ አዜ እንቀድመ ለህሌነ ሳምን ቃኑን፡ “ቃኑን እግል ሕሽመት አዳም ወዐማር” ሐንቴለ ትብል

ስቅራት እትብገሳመ ህሌነ። ምን ለሐልፊ ተጃርብ ለረኤናሁ፡ ለወቀዋኒን እግልነ መስል ገብእ፤ ሕነ እኩባሙ ለህሌነ ወሳይቅ እብ ተክስትህል ዲብ ተእሪክነ፡ ነባሪነ፡ ዓዳትነ፡ ዓዳት ወጠነ ራቴዕ ለአተንከበ ወምኑ ለልትበገስ ጋብእ ህለ፤ ናይለ ልብል ሰካላት በሊስ እግል ንርከብ፡ በሐስ እንወዴ ህሌነ። መጅተማዕ አተላላይ ሰበት ቡ፡ እሊ ነባሪ ውርስ እሊ አጅያል ምን ሕድ እንዴ ልትዋርሱ እግል ሊጊሶ ሰበት ለአስትህሎም፡ ዐቡቶም ለሸሬሕ እግል ልግባእቡ። እምበል አሳስ ነባሪ መጅተማዕ ለትመጽእ ዐቡት ወተጠውር አለቡ። ምን ሐረስ እሊ ለዲብ ነባሪ እጅትማዕየትነ ለለአተንከብ፡ አተላላይ ናይ መጅተማዕ ለለአክድ፡ ሐያትነ ወመንበረትነ እብ ለሔሰት ወለጠፍሐት ገበይ እግል ንምረሕ ለለአቀድረነ፡ ለእት ፍንጌነ ለህሌት ዕላቀት መግወነት ወሰዳይት ሕድ ለከምክም ዕላቃት ቱ። እሊ እብ ከአፎ እንዴ ተሓበረ ገይስ ወሕድ መስል እንዴ እምቤ፡ እግል ነባሪ ቃሊ ዝያደት ደማነት ክም ተህሌ እግሉ እንክድም ህሌነ። መጅተማዕ ወደማነት መስተቅበሉ፡ ምስል ሕሽመት ወነባሪ ናይለ ገቢል እግል ልትመሳኔ ወልትመቅረሕ ሰበትቡ፡ እተ ለሐልፊ ወቅት ምስል ወሳይቅነ ወምስል ሩእየትነ ወእስትራተጅየትነ ጸብጣሙ ጸነሐነ፡ እተ ለነህይቡ ከደማት ለህለ ነዋቅስ ሚ ክምቱ እግል ንፈርግ ጅሩባም ዐልነ።

ለካልኣይ ወዲብ ደንጎበ ለመጽአ ጋር፡ ምን ኩሉ ክእሉል ለረከብናህ፡ ለቃኑነ እግልነ መስል ህለ ሚኢኮን፤ መጅተማዕነ፡ ነባሪነ፡ ዓዳትነ፡ ተእሪክነ፡ ውሕደት እጅትማዕየት፡ ወሐዮት ዓዳትነ መስል ወወክል ሚኢፋሉ ባሐሶት ቱ። እሊ ነባሪ ላጼሕ እሊ እግል ኢልክሳሕ፡ እግል ንዳፌዕ እግሉ ወንዕቀቡ፡ ምን ወቅት እት ወቅት እግል ነአትሓይሱ ወነአውርሱ ብነ። እሉ እንዴ ጸብጠ ለወርስ ወለለአወርስ አጅያል፡ ምን እሊ መባድእ እሊ እግል ልትበገስ ወጅቡ። ሄራር እሊ ካድም እሊ ከአፎ ክም ህለ እንጌምም ጸነሐነ ወህሌነ። አዜመ እትሊ መብዳእ እብ ውሕደትነ እጅትማዕየት፡ ዐዳትነ፡ ነባሪነ፡ ዋጅባት ወሐቅ ወጠኒ ዲብ ወግም እንዴ አተ፡ ማሌ አጅያል ሕድ እንዴ ወርስ ወለህይክ ለህይ እንዴ ለአትዐርፍ ለመጽአ፡ አተላላዩ እግል ልትአክድ ቡ። ዋጅባት ወጠኒ ዲብ ነድቅ ወጠንየት፡ ብነእ ዋጅባት ወጠኒ፡ ወዲብ ፈዓልየት ሄራር በርናምጅ ዐማር ኩሉ እብ ሕበር ሕድ እንዴ አግመለ ዲብ ነባሪ እግል ልትከምክም ቡ። እሊ ዲብ መዳፈዕት ጀራይም ወአደቀቦትለ ነባሪ ናይር፡ ተረት እግል ተህሌ እግሉ እንዴ ትባህለ፡ እምበል አትካራም እንወድዩ ለህሌነ ጅህድ ወጌማማትቱ። እሊ ናይ ዮም ዓመት ዋዕላመ ሀደፉ ምን እት ሰነት 2021 ለገብአ ማሕበር ጎማት ሳምን ቃኑን ለልትፈንቴ ኢኮን አተላላይ ናይቱ። እግል ነአምረ ለብነ፡ ለነባሪ ውራሰት ለእምብሉ ሰኒ ረቂቅቱ፡ ዲብ ለገብአ ልግባእ ወቅት ኢበሌ ወኢልትመሳሕ። ምን ግም እት ግም እንዴ

ልትዐዴ ነብር ለጸንሐ ነባሪ ቃሊ፡ ምን ኣብዕቦታትን ለወረሰናሁ፡ ቃኑን ወንዛም መንበረት ምስል ለለኣምር ወለለሐሽም፡ ዲብ ተእሪክን ወናይ ቃኑን ነባሪን፡ ኣምኣት ሰነዋት ለወዳ ነባሪ ሕሽመት ሕድ ለመልክ መጅተምዕ ብነ። ከእሊ ቃኑን እሊ ምን ወቅት እት ወቅት እግል ልትሓየስ ሰበትቡ፡ ሐቴ ምስሉ እግል ንትዋፈቅ ወካልእመ እግል ነኣትሓይሱ እንከድም ጸነሐነ።

ከለ ዋሳይቅ ክም ረኤናሆም ልሳዕ እግል ልትሳኔ ለቡ ብዙሕ ክም ሀለ፡ መጅተማዕ እግል ለኣምርም ወልውረሶም ለቦም ክምሰልቶም እግል ልትኣመሮ ሌጠ እንዴ ኢገብእ፡ እግል ልትሓየሶ ገብኣው ምን ገብእ፡ እተ ነባሪ ወዳዳት ለረከዘ ኣትሳናይ ወኣትሓየስ እግል ልግባእ ዲቦም እንዴ ትባህለ ትበገሰ ወምስል ለህሌነ ዲቡ ዘበን እንዴ ልትመሳኔ ልሂርር ሀለ። ሰበት እሊ ለናይ ዮም ዓመት ሳምን ቃኑን ወዛረት ዐድል፡ “ቃኑን እግል ሕሽመት ኣዳም ወዐማር” ምስለ ትብል ስቅራት እትጽብጣመ ሀሌነ። እግል ዐማር ለብናተ እስትራተጅየት ወመብዳእ ዋድሐት ሰበት ገብኣት፡ ምስል መብዳእ ደማነት ዲብ ኖስ፡ ዐዳለት እጅትማዕየት፡ ሐር ሕርያን፡ ወብዕድ ለልብሎ ልትሸቄ እቦም ለጸንሐው መባድእ ዲብሚ ለረከዘው ቶም፤ ምን እምብል፡ ክሎም ዲብ ነባሪ መጅተማዕ ለኣተንከበው ቶም። ለፋይላት ኩሉ ቅዱም ሀለ። ለቀዱሙ ለህለው ሸባብ ህዩ፡ ምስለ ለህሌት ሓለት ሓድረት ወለነባሪለ መጅተማዕ እንዴ ኣትጸበጠው እግል ልርኣው ወለኣፍይሕዉ ወዝያደት ምን መጅተማዕ ኣፍካር ራቴዕ ወሴድያይ እግል ልርከቦ እግሉ ቱ።

እሊ ክም ረክብነ ሐሬ እተየ ደረጅት ክም ሀሌነ፡ ለናይ ዐማር መቀየሲና ሐድ ኣክል ኣዩ ለለኣደምዕ ክምቱ፡ ምስል ነባሪን እንዴ ኣትመጣወርን እንርእዮ እንዴ ሀሌነ፡ ገሌ-ገሌ ድራሳት እግል ልግባእ ገበይ ለፈቴሕ ምስዳራት ልትነሳእ ሀለ። እብሊቱ ለ“ግድላነ ግድለ ኣጅያልቱ” ለምብል። እሊ ሰበት ገብኣ ለኣወላይ ግም እግል ከሊቅ ወጠንየት ወመስኡልየት ኣሮት መዋጥን፡ ረዩም ለሂርር እቡ ለጸንሐ ጸር ምርካብ ሕርየት፡ ኣከዶት ዐዳለት፡ ቃኑን ወንዛም መጠር ነባሪለ መጅተማዕ ደማነት ክም ረክብ ከዲም ቱ። ህቱ ህዩ፡ ዲብ ሙኣሰሳት ለረከዘ ሌጠ እንዴ ኢገብእ፡ ክም ዐላይም ወመፈረጊ ናይ መጅተማዕ ኤረትርየ ሰበት ገብኣ፡ ምለዐለ ኣዋጃት ወወሳይቅ፡ ለመጅተማዕ ሂራሩ ምስል ለህሌት መርሐለት እንዴ ቀርነዩ ለሸቄ ዲቡ ሰበት ገብኣ፡ ለኣወላይ ጂል ሕርየት ወጠን ወወጠንየት ሐቆለ ኣከዶ፡ ዲብ ዐቦትለ መጅተማዕ፡ ጅንስዩቱ፡ ወዳዳቱ ወነባሪሁ እንዴ ለኣክድ መጽኣ። ለካልኣይ ጂል ህዩ፡ እግለ ለዐለ ጸባይብ ወተረርፍ እስትዕማር እንዴ ነሐ፡ ለተኤተነ በርናምጅ ዐማር እብ ዐውቴ እግል ለኣትምም፡ ከድም ለጸንሐቱ። ለሳልሳይ ጂል ህዩ፡ እብ ክሉ ኣሽናኩ መቅደረት ካፍየት ለቡ፡ ምህነት ለመልክ፡

መትሳባል፡ ደማነት እት ኖስ፡ ክምሰሌሁመ ኩሉ ለከምክም ነባሪ እንዴ ሐጠጠ፡ ለመስኦልየት ወጠንየት እግል ለአትምም ዲብ በርናምጃት ዐማር እንዴ ትጸመደ ሸቄ ለሀላቱ። እሊ አሳዳር እሊ ህዩ እግል ናይ ቀበትነ ሄራር፡ መቅደረት ኖስ፡ መብዳእነ ሕጡጥ ረአሱ ቀደም እግል ለአሽክቱ እብ ክለ ሒለቱ ወመቅደረቱ ከድም ለጸንሐ ለሳልሳይ ጂልቱ።

ለፈጅር ንትጸበረ ለህሌነ፡ ምስል ድዋርነ ወምንኬኑ ለትትጃገር ዐቦት እግል ተሀሌ እግልነ፡ ለትወቀለት ምህነት ለቡ መጅተማዕ ክም ልትበኔ፡ ምለዐል ኩሉ ህዩ እግል ወጠነ ጅብት ሕሽመት እንዴ አስመደ እግል ልሸቄ ለትበገስ ሰበት ገብአ፡ እብ ፍዕል ለአስደዩ ነባሪ ሐበን ደማነት ክምተሀሌ እግሉ እንዴ ወዴነ፡ ምን እሊ ወሐር እበዱ መርበይ እግል ነሄርር እንቀድር ለልብል ሰኣል፡ ዓመተን ናይ ሕበር ፈህም እግል ለሀሌ እግልናቱ ለሀደፍነ።

ወዚረት ወዛረት ዐድል አሰይዳ ፎዝዩ ሃሽም፡ እብ ምናሰበትለ ምን 13 አስክ 18 ማርስ 2023 ለትገብእ ሳምን ቃኑን እተ ወዴተ መቃበለት ናይለ ሀበቱ ተውዴሕ 2ይ ወናይ ደንጎበ ክፋል ልተላሌ፡- ሰኣል፡- ሕሽመት አዳም እምብል እንዴ ህሌነ ሚ በሀለትና ቱ፤ ክምሰሌሁመ፡ ቀዋኒን መጅተማዕነ እግል ኪደት ሕሽመት አዳም ከአፎ ልርእዩ፤ በሊስ፡- ክምሰለ እብ ዓመት ለረኤናሁ አዳም መክሉቅ ሰበት ገብአ፡ ለክም መክሉቅ ለተአስትህሉ መራዐየት፡ ክድመት፡ ሕሽመት፡ ምነ ነባሪነ ወዓዳትነ እንዴ ልትወረስ ለመጽኣቱ። ከእሊ ወሳቅ እሊ ለለአክዱ ምን ለሀሌ ዲብ ናይ ብዕዳም ወሳይቅ ኢረክዙት እብል ዐልኮ። ክለ መክዩሊ ሚቱ፤ አሮት ሕዱድ ወእግሉ ለልትሀዩብ ሐቅ እንዴ ኢገብእ እግልነ ሕሽመት ሚን አደም ልትበሀል እንዴ ሀለ፡ ናይ ጠቢዐት ወርስቱ። ጅነ ምን ልትወለድ እንዴ ዐበ ክም አዳሙ አስክ ለሐልፍ፡ እግል ለሀሌ እግሉ ለቀድር ሕቁቅ ዲብ ነባሪ እንዴ ረከዘ ክም ልትረኤ እመርቱ። ሕነ እንዴ ፈናቴነ ለእንርእዩ ኢኮን።

ነባሪ ወሕቁቅ ልትበሀል እንዴ ሀለ፡ ናይ ሕበር ጠቢዐት እጅትማዕየት ለቡ፡ ክል አሮትክ እብ ቅያሱቱ ለልትረኤ ድኢኮን ናይ ብሕተ ኢኮን። ሰበት እሊ እምብሉ ለህሌነ ነባሪ ለአሳሱ ዓይለት ሰበት ገብአት ምነ ልትበገስ። እግልሚ ምን እምብል ለአሳስ ናይ ክል መጅተማዕ ለዓይለት ተ። ዲቡ እግል ተሀሌ ለበ ዕላቀት እጅትማዕየት ዑፊት፡ ዲቡ እግል ለሀሌ ለወጅቡ ነባሪ አተላለዮም ወአፍረዮት ናይ መዋጥኒን ዑፍያም ወብቅዓም፡ ዲቡ እግል ተሀሌ ለበ መራዐየት ናይለ ዓይለት፡ መዓዩ ወእብ ዐቢሁ ህዩ ናይ መጅተማዕ ወወጠን ለከምክም ሰበት ገብአ፡ እሊ ህዩ እብ እኩብ ድኢኮን እብ ብሕተ ለልትረኤ ኢኮን። ለናይ ብሕተ ሄራር ዐቦት ዕላቀት ወአፍረዮት ምነ ናይ መጅተማዕ

እንዴ ፈንቴስ እግል ትርአዩ ኢትቀድር። ከለ ጠባይዕለ ነባሪ ምን ክልቀቱ እግል መጅተማዕ ለወክል ሰበት ገብአ፡ ለልትረኤ ነዋቅስ አውመ ድዕፍ ወለኢትለመደ ፍዕል ወጠባዬዕ ህለው ምን ገብእ፡ ሐር እንዴ አቅበልክ እግል መጅተማዕ ለሰፍፍ ወለልሰዕር፡ ወለ እሊ ለእምቤሉ አከይ አፍግል ለወዱ ምን ሐዲስ ዲበ መጅተማዕ እንዴ አቅበለው እግል ልትሰይሖ ወእግለ መጅተማዕ እግል ልክደሞ ለለአስትህሎም ኦሮት ክፋል ናይለ ነባሪቱ። እሊ አዜ እብ ደረጀት አጀኒት፡ አዋልድ አንሳት ወውላድ ተብዕን ወእብ ደረጀት ዓይላት እንዴ ካፈልክ ለልትረኤ እንዴ ኢገብእ፡ እብ ክምኩም እግል ንፍሀሙ ብነ። ለዓይለት ክም አሳስ ኦሮት መጅተማዕ ሰበት ገብአት እብ ተማመ ወእብ ደረጀት አፍረዮተ እግል ነአክድ ብነ። እግልሚ ለዓይለት ዲበ ቀበትለ መጅተማዕ፡ እት ዐቦት እቅትሳዱ፡ አተላለዮቱ ወብዕድ ለተህሌ እግለ ተረት ዐባይ ሰበት ገብአት፡ እብሊ ቅደስ እሊ እግል ልትረኤ ለአስትህል።

ምን ሐረስ እሊ ለእምቤሉ ወሳይቅ ቀዋኒን ምን ሐዲስ እግል ልትረኤ ቡ። የምክን እተ ለልትቀደም ውራቅ ምን ሰነት 1948 ወእንዜ ለዐለ ወለሀለ እብ ደረጀት ወጠን ልግባእ ወእብ ደረጀት ዐለም ለዐለ ነባሪ ሕሽመት ወድ-አዳም ከአፎ ትጠወረ፡ መሻክል ዓዳት ወለመድ ምን ለሀሌ ዲቡ ህዬ እብ ከአፎ እግል ልትረኤ ወልትሰየሕ ቀድር፤ ምን ወቅት ለሀይ እሊ ወሳይቅ እሊ ምን ወቅት እት ወቅት ዝያድ 80 መደት አትሳናይ ወአትራትዖት ገብአ ዲቡ። እሊ ወሳይቅ እሊ ለከስስ እብ ደረጀት መንጠቀትነ ወዐለም እጅትምዓት አውመ መሓብር ጎማት ገብእ ዲቦም እንዴ ህለ፡ ሕነ እተ ወቅት ለሀይ ሐንቴ እስትዕማር ሰበት ዐልነ፡ እግል አከዶት ወጠንዮትነ ወስያደትነ ወሕረየት ንትጋደል እተ ለዐልነ ዲቡ ወቅት፡ እሊ ለእምቤሉ ወሳይቅ ክም መበገሲ ምንመ ኢንትነፋዕ እቦም፡ ምን አሳስነ ሳቱ ነባሪነ እንዴ ትበገስነ፡ እግል አከዶት እሊ ቃኑን እሊ ዐውል ቃሊ እንዴ ደፋዕነ ለአከድናሁ ነባሪ ሕሽመት አዳም ወሐቁ፡ ምን ወሳይቅ ወቀራራት ቀዋኒን ለረክዝ ወለልትበገስ እንዴ ኢገብእ፡ ናይ ተእሪክ እስባት ለቡ ሰበት ገብአ ዲቡቱ ለእንረክዝ።

እሊ እንዴ ረኤነ እግል ነአትመጣውሩ ህዬ፡ ለእምቤሉ ወሳይቅ ቃኑን ሚመስል፡ ከአፎ ትጠወረ፡ ሚዶል ትከተበው፡ ምን ወክሎ ዐለው ወህለው፡ ለልትበሀል ሰኣላት ዲበ እግል ልትቀደም ዱሉይ ለሀለ ውራቅ እግል ልትቀደም ወዝያደት ተውዴሕ እግል ልትሀየብ ዲቡ ክምሰልቱ፡ ህቱ ክም መበገስ እንዴ ገብአ፡ ሕነ ህዬ እተየ ደረጀት ህሌነ እግለ ልብል ሰኣል፡ እብ ቅብላትለ ዲብ ነባሪ መጅተማዕ ለሀለ እግልነ መባጥር፡ እንዴ ልትወረስ ለመጽአ ዓዳት ወነባሪ፡ ዲብ ቀዋኒን ምስል እሊ አዜ ለህሌነ ዲቡ ወቅት እንዴ ነአትራትዑ ወነአትሳንዩ ወእግል ኖስነ እተየ ደረጀት ክም ህሌነ

ለወዴሕ ጽበጥ እተ ሄራርነ እህትማም ለልትሆየቡ ቱ። ሰኣል፡- እብ መናሰበት ሳምን ቃኑን እግል ቲቤለ ለተሐዚ ልእከት ምን ተሀሌ፡ በሊሰ፡- ኦሮት ምን ጸብጣሙ ወእንሸቄ ዲቡ ለሀሌነ ሸቅል፡ ሕነ እትሚ ደረጀት ሀሌነ፤ እግል እረክዝ ዲበ ለሐዜ ጋሪት፡ ቀዋኒን እግል ዓዳትነ ወነባሪነ ወክል ሀለ ሚኢኮን ለልብልቱ። ናይ ዶሉ እምብል፡ ዲብ ነባሪ ላኪን ሓለት ሓድረት ለልትበሀል አለቡ። እግልሚ፡ አሳስ እሊ ነባሪ እሊ ርዝቅ ውራሰት አጅያል መጅተማዕና ቱ። ከእሊ እምብል አትካራም በሐስ ወድራሳት እንዴ እንወዴ ዲቡ፡ እግል ልትረሰዕ ለአለቡ መባድእ እግል ነአትአቱ፡ ዲብ ለመድ እጅትማዲ ወዲብ ኩሉ ነባሪ ቃኑን ወቅያሱ፡ እብ ስያሰት እጅትማዕየት፡ ሰቃፊት፡ ዓዳት፡ ተእሪክ ወብዕድ እንዴ እምብል ንትሃጌ።

እሊ አርእስ እሊ እበ እንክር ለኦሮት ዲበ ለሀለ እግልነ ወሳይቅ ቃኑን ውራሰት ከአፎ ሸርሓም ክም ሀለው፤ ለአዳም ምን ልትከለቅ አስክ ለሐልፍ ለሀሌት እግሉ ሕሸመት እብ ደረጀት ደረጀቱ እግል ልትጌመም ሰበት ወጅቡ፡ እብ ከአፎ ዲብ ፍዕል ነአውዕሉ፤ ለልብል ሰኣል ዲብ ናይ ቃኑን መጅተማዕ ወሳይቅነ ክምሰለ ቀደም እለ ለትሸርሐ፡ እግል ቀዋኒን ዓዳት ወለመድ ለእምብሎም ሀለው። አነ ላኪን ቀዋኒን አሳሲቱ ለእብሎም። አሳስ ቃኑን ለእምብሉ ዝያድ 500 ሰነት ለወደ ናይ ቃኑን ወንዛም መንበረት እብ ሕበር ለለአክድ፡ እብ በሀል ነባሪ ለልትደገም ወለልትወራረስ ወእብ ክቱብ ለጸንሐ፡ እግል ዐቦት ወተጠውር መርበይ ራቴዕ ለለአጸብጥ ወእንዴ ልትከተብ ለሄርር ለጸንሐ ቀዋኒን ሰበት ገብአ፡ ምን መደት ግድለ ታሕሪር ለአምበትናሁ ወእትሊ ለሀሌነ ዲቡ ወቅት ለሀለ እግልነ ቀዋኒን ክም ሸሬሕ ወክምክም ጋብእ ሀለ። እሊ ኩሉ አዜ፡ እግል ንሸቄቡ እተ ንትበገስ ዲቡ ለሀሌነ ወክድ፡ ለአምር ዲብ አካኑ እንዴ ሀለ፡ እሊ ላኪን እብ ለትፈናተ አስብብ እበ ነዳፊቱ ሀለ ወኢከስሐ እግል ኒበል ኢእንቀድር። ለዐባዪ ወክም አሳስ ለልትነሳእ መባድእ ዲብ አካኑመ ለሀሌ እንዲኮን፡ ለበደ አውመ ከስሐ ወተሓበረ ለእብሎ አሸናኩ፡ ምን ሓዲስ ዲበ አስሉ ብልሰቱ አሳሲቱ።

እግልሚ ዲብ አሳስለ ቀዋኒን፡ እተ መበገሲ ቃኑን መጅተማዕነ ምን ኢነአቀብል መሻክል እግል ልሳድፊነ ቀድር። ክላፋት እተ ለሀሌ ዲቡ ወቅትመ፡ ሻኪ ወሸኩይ ክሎም እንዴ ትሰይሐው ወእብ ቃኑን ነባሪነ እንዴ ተዓረው፡ ዲብ መዳፊዕት ጀራይም፡ ዕቅበት ቀዋኒን ነባሪነ፡ ውሕደት ወሰላም መጅተማዕ ለለአክድ መባድእ እግል ለሀሌ፡ ዲብ መሓረበት መግሀፍ ወዝልም ወትምኔት ብሕተ ዲብ አብደዮት፡ ለመጅተማዕ ተረት እግል ተሀሌ እግሉ ክም ቀድር እግል ንክደም ብነ። ዓመተን ምን አሳስ ቀዋኒን ላቱ ነባሪ ወለ ዐለ እግልነ ዓዳት ናይር ኢከስሐ ይእምብል። ሰበት እሊ ዲበ መበገሲነ

እግል ነአቅብልቱ እንከድም ለህሌነ። እብ ፍንቱይ ክላፋት እተ ለመጽእ ዲቡ ወቅት፡ ፋይላት ቀድያት እንዴ ፈታሕከ ቅራመት እንዴ ኢትገብእ፡ ዲብ አሳስከ እንዴ አቅበልከ፡ ዕሬ ወመፋህመት ሕርያን ብዕድ ለአለቡ ክምሰልቱ፡ ምስል መሳሌሕ ወመክሰብ መምተለካት ለልትጸበጥ እንዴ ኢገብእ፡ እግል አከዶት ነባሪ ቃሊ ወአተላላይ ናይለ መጅተማዕ ለወክል ወለለሓብር ዓዳት ዐዳለት ወፍቴሕ እግል ለህሌ እግልናቡ። ውፋቅ እጅትማዒ ወመቅሬሕ ዕሬ ዓዳትናቱ። መዓወነት ሕበር ለኢበሌ ዐላይምናቱ።

ካድም እግልመሳሌሕ ብሕተ ወመካሰብ መምተለካት እብ መጅተማዕናመ ቅቡልየት አለቡ። እሊ አዜ ልትረኤ ለሀለ ናይ ብሕተ መካሰብ ኖስ እግል አከዶት፡ ወምነ ለጸንሐ እግልነ ቀዋኒን ውራሰት ክም እንረይም ገብእ ለሀለ ጀርቤታት፡ ኦሮት ምነ እግል ልትከረዕ ለቡ ሰበት ገብእ፡ ዲብ አሳስለ አማነ ክም ነአቅብል እግል ንክደም ብነ እብል። ኩሉ ለንትፈረግ እቡ ዐላይም ቃኑን ውራሰት፡ ዲብ ዓዳትነ፡ ለመድነ፡ ነባሪነ፡ ታርክነ፡ ሰቃፊትነ፡ መንበረትነ እጅትማዕየት ወዲብ ዕሬነ ወመቅርሕነ እግል ነአክድ ገብአነ ምን ገብእ እተ አሳስነ እግል ነአቅብል ወምነ እግል ንትበገስ ወጅብነ። እሊ ካድም እሊ ህዩ እምበል አትካራም ወሕላሌ እንሸቄ ዲቡ ለህሌነ ጋርቱ። ዲመ ምስል ሸዐብ እተ ለእንወድየ ጎማት ወተሐይስ ተሐምቅ እብል እቡ። ዲብ ሙአሰሳትነ፡ ዲብ ፈሀም እሊ ነባሪ እሊ ለሀለ ነዋቅስ፡ ወእግል አከዶት መሳሌሕ ኖስ ለአገብእ ጀርቤታት፡ ምነ አሳስነ ለፈግረ ወእግል ኦኦዳትነ ለኢወክልቱ። ከእሊ አፍዓል እሊ ብዙሕቱ ምንመ ይእምብል፡ እሊ እግል ንሰየሕቱለ እብ ክለ ሒለት እንከድም ለህሌነ።

ሰበት እሊ እት ረአስለ እኩባሙ ለህሌነ ናይ በዲር ወሳይቅ ቃኑን ነባሪ ምን ሸዐብመ ለተአደቅቡ ሐብሬ እግል ንርከብ እግሉ እንሸቄ ህሌነ። ምለዐል ኩሉ ለልትከለቅ ክላፋት ዲብ አብያት ፍርድ ፋይላት እንዴ ኢልትፈታሕ እግሉ እብ ዕሬ ክም ተምም እንከድም ህሌነ። እብሊ አብሳር እሊ ለልትከለቅ ክላፋት እግል ተአስክብ ወትባሌሕ ለቃኑን ኖሱ ሰሜሕ ላኪን ልትሸቄቡ ኢጸንሐ። ኩሉ ቀድያት እጅትማዒ እብ ዕሬ እንዴ ኢትጀረበ ዲብ መሓክም ፋይል እግል ልትፈታሕ አለቡ! ለልብል መብዳእ ወስታት እንዴ አፍገርነ እግል ንሸቄቡ ብገላም ክም ህሌነ እግል ሐብር እፈቱ። እሊ እንዴ እምብል ላኪን፡ እግላ ቀዋኒን ውራሰት ለለሐሽሞ፡ ለገብእ ቀድያት ክላፋት እብ ዕሬ ወመፋህመት እግል ልትመም ለለሐዙ፡ እብ መካሰብ ብሕተ ለኢለአምኖ፡ ሕሽመት ወድ አዳም ለለአክዶ፡ ወጀለ ሕፍዘት ወአውረሶት እሊ ለትባህላ ቀዋኒን ሕሽመት ለልትበገሶ ወለ ሰዱ ላባም ኢህለው በህለት ኢኮን። መጅተማዕ ህዩ እግል እሎም ለመስሎ ላባም አውለውየት እግል ለሀቦም

ወጅቡ። ዐዳለት እብ ሰላዲ ኢትዛቦየ። ነባሪ እብ ሰላዲ ኢዳይም። ነባሪ መጅተማዕ እብ መትሰባል። እብ ዐዳለት። እብ ለኢለአትካርም ጅህድ ሕብር። እብ ሕሽመት ሕድ። ፈተ ወመዓወነት ሕብር። እብ መብዳእ ዐቦት ወተጠውር ሕብር ወብሕታቱ ለልትጠውር። ለዐቤ ወልትወረስ። ለአሳሱ ህቱ ሰበት ገብአ። እሊ ነባሪ እሊ ህዬ ዲብ መንሀጅ ታዕሊም እንዴ አተ እግል ልትደረስ ቡ።

እብ ፍንቱይ እሊ ክፋል እሊ ዲብ ሰነት ድራሰት 2024 እብ ደረጅት ወጠን ዲብ መንሀጅ ታዕሊም እንዴ አተ ኩሉ መዋጥን ክም ለአምሩ እግል ኒዴ ቱ። ዲብ ውራሰቱ። ደማነት አተላለዮቱ። ሕፍዘቱ ወዐቦቱ ህዬ። እብ መሻረከት መጅተማዕ ሰበት ልትአከድ። እሊ ሳልሳይ ጂል ለእምብሉ። እብ መትሰባል ወመቅደረት ብቅዕት እንዴ ተዐንደቀ ከድም ሰበት ህለ ናይ ክልነ መሻረከት እግል ተአትሐዜናቱ። ከእትለ እግል ካልኣይ ዶል እንወድየ ለህሌነ ሳምን ቃኑን። ፈሀም ገቢልነ ዲብ ቃኑን ከአፎ ክም ህለ። ዲብ 38 መራክዝ። ምን ሸዐብ አፍካር ሴድያይ እግል ንርከብ ሰአየት ብነ። ለጅህድነ ምስል ሸዐብ ለኢለአትካርምቱ። ነባሪነ አሳስ ደማነት መስተቅበልናቱ። ኩሉ ክድመት ዐድል ለቀድም ሙአሰሳት ዐድል ወመጅተማዕ እብ ሕብር እንዴ ጨመርነ ክም እንሸቁ እንከድም ህሌነ። ከነባሪነ ዕላመት ሐብነ ሰበት ገብአ። ለመጽእ አጅያልነ ለሔሰ ተጠውር ወዐቦት እኩድ ዲቡ ለህለ ነባሪነ። እብ ዕጹፍ እግል ልሕፊዙ ወዐቦቱ እግል ለአተላሌ። ለኢልትሐለል ጅህድ ሕብር ክም ለአትሐዝዩ እግል አትፋቅድ እፈቱ።

ኤረትርየ ሓዳስ

አርቡዕ 15 -22 ማርስ 2023